



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

კემულარია კლოდ დე

კემულარია კლოდ დე (Claude de Kemoularia) (30.III. 1922, პარიზი, - 4. XI. 2016, იქვე), საფრანგეთის პოლიტიკური და საზოგადო მოღვაწე, დიპლომატი, საბანკო საქმის ორგანიზატორი. პოლიტ. და ეკონ. მეცნ. დოქტორი. პოლიტ. ემიგრანტის, საქართველოს დემოკრ. რესპ. მთავრობის წევრის, იოსებ კემულარიას (1880-1957) შვილი. დაამთავრა სორბონის უნ-ტის იურიდ. ფაკ-ტი და პარიზის პოლიტ. მეცნ. უმაღლესი სკოლა. კ-ს მინიჭებული ჰქონდა საგანგებო და სრულუფლებიანი ელჩის დიპლომატიური რანგი (1982), 1982-84 იყო საფრანგეთის საგანგებო და სრულუფლებიანი ელჩი ნიდერლანდებში. 1957-80 და 1984-87 მსახურობდა გაეროში. იყო გაეროს გენ. მდივნის თანაშემწე, სამდივნოს უფროსი და პირადი წარმომადგენელი, საინფორმაციო სამსახურის დირექტორი ჟენევაში. საფრანგეთის მუდმივი წარმომადგენელი გაეროში. 1985-86 ორჯერ აირჩიეს უშიშრ. საბჭოს თავ-რედ. საფრანგეთის პრეზიდენტის, ფ. მიტერანის მრჩეველი საგარეო ეკონ. ურთიერთობათა დარგში (1981-82). საფრანგეთის ერთ-ერთი უდიდესი ბანკის, „პარიზას“ პრეზიდენტი (1988-98). კ. არჩეული იყო ომანის საერთაშ. ბანკის დირექტორთა საბჭოს უფრ. წევრად, საფრანგეთ-კატარის და საფრანგეთომანის ბიზნესკლუბების პრეზიდენტად, ფრანგულ-არაბული სავაჭროსამრეწვ. პალატის დირექტორთა საბჭოს წევრად. 1992 მონაწილეობდა თანამედროვე მსოფლიოს პოლიტ. ელიტის პოლიტ.-ეკონ. გაერთიანების - „ბილდერბერგის კლუბის“- კონფერენციაში, როგორც საფრ. დელეგაციის წევრი. იმავე წლებში აირჩიეს გაეროს საფრანგეთის ასოციაციისა და საერთაშორისო საბჭოს „მოძრაობა ევროპისაკენ“ („Mouvement Europeen“) საპატიო წევრად. 1987-96 იყო ფრანგული მოდის ერთ-ერთი გამორჩეული ვარსკვლავის, ფირმა Nina Ricci-ს დირექტორთა საბჭოს წევრი.

2002-იდან კ. იყო საერთაშ. პოლიტ. გაერთიანება „მონაკოს“ კლუბის ერთ-ერთი - დამაარსებელი, 2005-იდან - პრეზიდენტი, კლუბთან არსებული ხმელთაშუაზღვის

საკითხების პოლიტ. შესწავლის ინ-ტის დირექტორი, 2006 მსოფლიო პოლიტ. ფორუმის – „ახალი მსოფლიოს პოლიტიკური არქიტექტურა“ – ერთ-ერთი ორგანიზატორი და მთავარი მომხსენებელი.

კ-ს გამოქვეყნებული აქვს მნიშვნელოვანი შრომები პოლიტ. მეცნ. და ეკონ. დარგში. შეყვანილია საფრ. პრესტიჟულ ენციკლ. გამოცემაში „ვინ ვინ არის საფრანგეთში“ („Who's Who in France“). დაჯილდოებულია „საპატიო ლეგიონის“ 2 ორდენით, საფრ. ღირსების ორდენით და სხვა სახელმწ. ჯილდოებით. 1988 მიენიჭა „საპატიო ლეგიონის“ ოფიცრის წოდება.

2010 კ. საქართველოში ჩამოვიდა და თავისი წიგნის პრეზენტაციაზე განაცხადა: „...სანამ ცოცხალი ვარ, ევროპაში საქართველოს ინტერესების დასაცავად ყველაფერს გააკეთებ... იამაყეთ, რომ ქართველები ხართ... მჯერა, რომ საქართველო ევროკავშირში განწევრიანდება და ევროპაში კუთვნილ ადგილს დაიკავებს“.

თხზ.: ცხოვრება გაშლილი ფრთებით. მემუარები, ფრანგულიდან თარგმნეს: პრინცესა ვერონიკა მიურატმა, შ. ჭაბაშვილმა, მ. გობეჩიამ, თბ., 2010.

ლიტ.: კო ბ ი ა შ ვ ი ლ ი ნ., პარიზი. კლოდ დე კემულარია (შორეული – ახლობელი), თბ., 2010; უ რ უ შ ა ძ ე ლ., კლოდ კემულარია – საფრანგეთში მოღვაწე ქართველი, «ფუძე», 2007, №2; The Journal of Modern African Studies, 1993, გვ. 31, №4.

დ. ურუშაძე
